


Kikboksing kisim gutpela nem long kantri



MI KAM: Michael John Padre i soim stail bilong em na redi long pait.

James Kila i raitim

WANPELA yangpela kik-boksa husat i save pilai insait long Goroka Nandex Kikboksing Skul i save gat bikpela driman tru long makim kantri wanpela de.

Nem bilong dispela yangpela man em Michael John Padre na dispela stail bagaros em i bilong Simbu provins tasol em i gro ap long Nokondi kantri long Goroka na em i save tren aninit long kala bilong Isten Hailans provins.

Na dispela yangpela man i save tren hat tru. Em i save soim bikpela laik tru long raun bilong em na tu long dispela spot bilong kikboksing.

Michael i save pait o pilai kikboksing aninit long 60-kilogram divisen. Na bikpela tingting bilong em insait long dispela divisen em long kamap wanpela sempion spotsman. Olsem na bagaros i save givim olgeta taim bilong em long tren. Nau yet tu Michael i kamap olsem eking instrakta bilong Goroka Nandex Kikboksing skul long Goroka, we trening bilong ol i save kamap long Goroka Skaut Hol klostu long Wara Zogizoi long Not Goroka.

Michael i stori olsem em i bin go insait long spot bilong kikboksing long 2001 aninit long lukaut bilong narapela sempion boksa Willie Yoba. Dispela man Willie Yoba em sif instrakta Stanley Nandex i makim em long kisim blek belt long kamap o soim tru olsem em wanpela instrakta long PNG.

Bikpela luksave dispela yangpela man Michael i bin kisim em taim em i winim gol medal insait long Hailans rijinot sempionsip we i bin kamap

long Goroka long las yia 2005. Tasol pastaim long dispela Michael i save kamapim planti ol gutpela pait long ol narapela tonamen.

Long wanpela pait insait long nesene sempionsip we i bin kamap long Lae Michael i bin pait insait long wanpela strongpela salens tru taim em i bungim sempion bilong dispela 60 kilogram divisen em Peter Lailai. Dispela man Lailai em wanpela man husat em i lukautim Kimbe Nandex Kik boksing skul long Wes Nu Briten. Dispela man tu em i wanpela bilong ol lain husat i wok klostu wantaim Stanley Nandex long kirapim ol skul bilong kik boksing insait long PNG.

Michael i stori olsem dispela pait bilong em wantaim Peter Lailai i bin strong tru. Ol i mekim I go na Michael i lus insait long semi fainol.

Nau yet Michael i wok long tren hat tru na i redi tasol. Em i tok i gat bikpela sans i stap yet long makim kantri long pait long bihain taim. Dispela boi i save stap isi na bihainim laik bilong famili na i no save mekim nabaut.

Nau yet Michael i save stap olsem wanpela bodi gad bilong wanpela bikpela niusman bilong Isten Hailans provins, Zachery Per husat i wok wantaim The National niuspepa.

Na tru tumas dispela yangpela boi i gat gutpela stori tu.

Long las yia Michael i bin go lukim sampela wantok long Wes Goroka na i wokabaut i go bek long haus bilong em. Namel long rot em i bungim sampela ol raskol lain. Dispela taim 3-pela raskol man ya i banisim em na i laik paitim em tasol em i trikim ol na paitim ol nogut tru.



KAMAP NAWAWAN: Tuhat bilong Laurie Hanku bilong Pot Mosbi (rait han) na Simon Kotabu bilong Porgera i kapsait pinis long stap insait long dispela tonamen.

EITPELA man bai i brukim bun long pinis bilong dispela mun long lukim husat bai karim nem bilong Papua Niugini long go long ovasis narapela yia.

Ol bai kirapim sumuk insait long Kikboksing 8-Man Iliminesen tonamen long Pot Mosbi long Mas 27.

Man i winim olgeta bai makim PNG long wol 8-Man Kikboksing Iliminesen tonamen na husat i winim dispela pait bai kisim US\$1 milien (K6 milien).

Las yia 16-pela paitman i salens long Lae long nesene sempionsip we i lukim 8-pela i kamap na nau bai ol i bung gen.